



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Air India tayimtsü tsükokba
report July 11 nü sangdongtsü

Conrad Sangma-i
Durand Cup Trophy sayaogo



VOL. XXII ISSUE NO. 265 (ADOK 265)

DIMAPUR

YANGTEPNÜ (THURSDAY)

CHITENI (JULY) 10, 2025

₹ 5.00

Linük den külemi Nagaland sorkar mapa inyakera longkak ait

Kohima, Chiteni/July 09 (TYO): All India State Government Employees Federation (AISGEF) bhukuma Confederation of All Nagaland State Services Employees Association (CANSSEA) pur Bodhbarnü Kohima nung anogo ka national strike munga liasü.

Employee welfare aser pension reforms nung tebilemba lemsatapa osangbener senden ka nung jembidang, CANSSEA general secretary Yhunsenlo Kent-i Chief Secretary ajanga Nagaland Angh nem takhangba pongu agütsüba indang rateta ashi.

New Pension Scheme (NPS) agientsü aser Old Pension Scheme (OPS) tanaben benoktsü aser ano national level demands 11 atema takhangba agüja AISGEF-i linük tesem ajunga nung longkak aittsü ayongzükba nung shilem ka ama Nagaland nunga iba sentong ya agi.

Nagaland sasap nunga sorkar mapa inyaker temi takhangba tejangja pongu agütsüogo, ta Kent-i ashi.

Pension Fund Regulatory and Development Authority (PFRDA) Act aser NPS agientsü akhangba nung sorkar mapa inyakeri state nung market-linked pension system agiena mapa inyaker ajak tejangja OPS küboki aitdaksütsü akhanger, ta ashi.

Fund managers temi state sorkar nem deposited amounts meyipa agütsütsüla aser subscribers ajunga EPS-95 kübok ayimbangtsüla, ta Kent-i ashi.

8th Central Pay Commission den lirumetema tekeraba nung State Pay Commission ka tentetsüla aser küm ter nung masü saka küm pongu nung khien pay revisions alitsüla, ta ashi.

Regular, pensioner aser contract nung inyaker sen

mamshi temang anepalutsü atema Chief Minister's Health Insurance Scheme (CMHIS) tenzükba ya junger, anungji Nagaland nung healthcare tajung agitettsü asoshi iba scheme kübok empanelled süa aliba mozüki tem indang infrastructure tajungba kumdaksütsüla ta ashi.

Parnokisa March 10, 2025 Vacancy Circular nung aliba ama IAS densema higher cadres tem induction atema eligibility norms ajak shidak amshitsü parnoki takhangba agütsü.

Kasa senden nung Nagaland NPS Forum tir Avizo Nienu-ia OPS aser NPS tsüngta metokmeperi aliba indang lemsatapa liasü.

"OPS kübok employees temi tatemsa anguba itasen shilem 50 angur. Saka NPS employees tem ita shia itasen nungi shilem ter contribution agüjaka, pension atema guarantee maliba yong parnok tarutsü tia mejangjai yutsür," ta pai ashi.

State employees indang NPS accounts asoshi sen 200 crore dak tema amshiba kuli tejangja maliba Treasury and Accounts Department data pai temai adoktsü.

NPS employees 1,000 dak tema indang accounts nung nil balance sayur, ta pai ashi.

Parnoki akhangba meinyakra longkak aitba tali tesashiba akumtsü, ta parnoki ashi.

Nagaland nung sorkar mapa inyaker atema NPS ya January 1, 2010 nü mesüra iba sülen shimer atema amshir. Ajisüaka iba scheme nung tashi mait, benefits tejangja maka aser family coverage peria mali ta sorkar mapa inyaker temi ola adoker.

Nagaland nung tang NPS subscribers 35,000 shi lir.

Kohima nung 5 Tribe CoRRP longkak ait



Kohima, Chiteni/July 09 (TYO): Bodhbarnü Nagaland Civil Secretariat, Kohima kima kin pongu nungi tanur aser tain, tetsür aser teburtem meyirijang aika pei kin sübotsü sübor adenshia longkak aita liasü.

Ao, Angami, Lotha, Rengma aser Sumi kin nungi longkak aiterem 5 Tribes Committee on Review of Reservation Policy (CoRRP) tawabangba kübok adenshia 1977 nungi tang tashi amshia aliba sorkar mapa nung menden wazüka yutsüba agienjang mesüra reserved positions tazüing aliba tem kin tulu pongu nem lemsajang ta akhang.

Longkak aiter temi banners aser placards tem amer liasü, kong "Onoki küm 48 tashi mapang telatet makai amshiba reservation policy anema longkak aiter", "Minimum cut-off marks makai Backward Tribe (BT) reservation ya system mesüshiba lir", "BT reservation küm 48 tashi aliba ajanga iba nükjidong alemogo", "BT reservation atema küm 48 aremzüka aruba joko maremter," ta zülua amer liasü.

Iba policy ya tejen kumogo aser kanga majung lir ta CoRRP ajanga ashir aser agientsü mesüra mamshi aliba quota tem

kin pongu nem lemsashitsütsü akhanger.

Mongulbarnü Nagaland sorkari iba committee dang longkak aitba songtemtsü ayongzük aser iba ken o ya 'institutional review' kübok lir ta shia liasü. Sorkari-isa Chief Minister ainlen nungi shilangba sülen state cabinet senden ka mena telemtetba agitsü ta metetdaksü.

Ajisüaka sorkari ayongzükba mangai CoRRP ajanga anogo ka longkak aittsü ya ayongzüka liasü.

5 Tribe CoRRP kübok kin tulu pongu yagi Nagaland sorkar dang reservation policy reprangshiang ta tezüluba nung takhangba agütsüba sülen iba policy reprangshitsü akhangba tang tesashiba akumer.

1977 nungi amshia aruba iba policy yagi state nung tang socio-economic aser shisaliok tsütsü asangsang den mapeter, ta parnoki ashir.

Kin pongu aliba district tem nung rally tulu ayongzükba sülen Deputy Chief Minister Yanthungo Patton-i June 3, 2025 nü parnok den senden ka ayongzüka amen aser sorkari Commission ka June 17 tashinung tentettsü nangzük.

Ajisüaka July 2 nü Chief

Minister Dr. Neiphiu Rio-i nüburtem dang aremzüka atatsü ayongzükba mapang, Commission mapa kanga tejangja aser tangsa tangbo results magütsütettsü, ta shia liasü.

Paisa administration nunga süang, reservation nunga süang, mesüra delimitations nunga süang, kechi temelenshi südir ajakji 2027 census sülen ang inyaktettsü ta shia liasü.

State sorkar ola madokba aser iba ken o nung terenlok maliba mechi CoRRP ajanga mener longkak aittsü July 3, 2025 nü sangdonga liasü.

Mezüngbo non-technical aser non-gazetted mapa nung menden shilem 25 ya kin tenet atema küm ter asoshi wazükja liasü. Item kin ya shisaliok aser rongsenketzüng nung ajemdaker aser state sorkar mapa nung nübu ajema aliba mechi 'backward' ta nungja agütsü.

Liyonga arudang reservation ya shilem 37 kumtsü, koba Eastern Nagaland Backward Tribes tenet atema shilem 25 aser state nung dang backward tribes pezü atema shilem 12.

Commission tenteta tashi agütsütsü asoshi sorkari mera tajung magira tensa tamajungba akumtsü ama CoRRP ajanga sayur.

CS-i Dimapur & Chümoukedima tzümetsüng tensa asadanga jaja

Dimapur, Chiteni/July 09 (TYO): Dimapur district nung July 5 nungi July 8, 2025 tashi tzünglu tanen makai aruba ajanga ajungben tzümetsüng adoka nüburtem kanga mejungi timtem ajurua lir. Anogo pezü nung tzünglu 959.076 mm jungnüa aru aser tesem kar nungbo 3600 mm tashi sashia aruba osang lir.

Tzümetsüng agi drainage system süngdaksü, lenmangtem mubang aser kibong aika pei ki yutsür tesem balala nung jenoka lir.

Iba yongji District Disaster Management Authority (DDMA) ajungben senden ka July 9, 2025 nü Deputy Commissioner, Dimapur indang Conference Hall nung mena liasü.

Nagaland Chief Secretary, Dr. J. Alam, IAS aser Advisor, New

& Renewable Energy, Nagaland State Disaster Management Authority (NSDMA), Z. Nyusietho Nyuthe nungeri item tzümetsüng timtem ajurua aliba tesemtem semdanga jajaba sülen senden ya mena liasü.

Iba senden nung Chief Secretary-i tekeraba nung field-level nung yariteptsü, Dimapur Municipal Council (DMC), PWD, Health, PHED aser Police densema department balala tsüngta teka amteper inyakttsü nungdakba ashi.

DDMA ajanga tatalokba osang agütsüba nung, tzünglu kanga sashia aruba mapang yariteptsüsa district merenemi liasü, ta ashi.

Nungdakba osettsüset peria meliaka State Disaster Response

Force (SDRF) ajanga atsüayonga melie mera agiba atema CS-i tenüsang agütsü aser rescue boats aser senotsü tali meshiba mezüing asadangtsü ta ashi.

Tzümetsüng adokba tesemtem nung tzü nungi tashidak balala adoktsüba tebilemstü iba senden nung benoka jembi aser Chief Medical Officer saksalema alitsü aser field assessments aotsü ashi. Medical teams temi merila sü aser emergency medical kits tem lema agütsüba maparen tenzükogo.

Iba senden nung Deputy Commissioner, Dimapur, Dr. Tinojongshi Chang, NCS menden liasü aser pai "DDMA Dimapur Incident Report for Flash Floods (July 5-8, 2025)"

nungja agütsür Dimapur nung tzümetsüng tensa indang PowerPoint presentation tejangja agüja liasü.

Iba presentation nungya field updates, ki o jen raksaba aser tang teyari agütsütsüba aser tarutsü nung ki o jen tashi itshitsüba, talisa airport aser National Highway nung tzümetsüng mela-mela tzümetsüng adoktsüba tesemtem nung teti asoshi infrastructure tashi itshitsü indang lemsatapa liasü.

Senden mamendang Advisor, New & Renewable Energy, NSDMA, Z. Nyusietho Nyuthe den Chief Secretary Nagaland, Dr. J. Alam, IAS aser sorkar ketdangsur temi Chümoukedima aser Dimapur tesem balala

semdanga liasü.

Parnoki Piphema-Tsiepama arütsü aser Kukidolong area semdanga sülen Olive Hospital junction anasa National Highway lenmang tia asadang.

Chief Secretary-i district administration aser NSDMA dang tzümetsüng agi kongshir aliba tesemtem semdanga teyari agütsüba maparen ketdangtsü inyakttsü aser nungdakba teyari ajak agütsütsü totuyuba agüja liasü.

Kasa mapang state sorkari Dimapur tzümetsüng lendong dak sendakba nung asü-amar kibong asem nem teyari sen lakh pezü-zü agütsü aser asürtem rongnung nisung ka jala, kinü tanur ka nem Chief Secretary-i sen lakh ka agüja liasü.

Fazl Ali College nung kaketshir tasentem atema orientation agi



Dimapur, Chiteni/July 9 (TYO): Fazl Ali College nung kaketshir tasentem atema orientation sentong ayongzüka agiogo.

Sentong nung o jembiba mapang Principal Dr. I. Wati Imchen-i kaketshirtem dang college nung kaketshisatsü bushiba mapang tajangshiba tasen angutsü tanüla tener tejakdangi aoba den külemi college nükla aser nukjiding atalokdaksütsü atema inyakyim ajungshia liasü.

Paisa, HSSLC tatidang takok nung ajangetba atema

kaketshirtem nem tenüngsang agütsüba den college pelashishia agizüka liasü. College nukjidingji Multidisciplinary Studies hub ka aser Indigenous Research centre ka kümdaksütsü asoshi lir, ta Imchen-i college nung tang tasen züngoksemba kaketshirtem dang ashi.

Taküm nungi college nung Commerce Stream-a amenokogo aser semester tasen tenzüksü lia kaketshir 28-i admission agiogo. Parnok ya college indang Commerce Stream nung mezüngbuba batch asütsü.

Principal-isa, Commerce kaketshirtem dang, parnok tasü aitba aser college-i takokba tashi kaket shisatsü tajungtiba agütsütsü ta tamang katetba atema parnok nem tenüngsang agüja liasü.

Iba sentong nungsa College administration-i, Arts, Science aser Commerce ta stream asemprongla nung mark timtiba ngur aliba kaketshirtem indang admission taah shilem 50 meyipa agütsütsü ta metetdaksü. Sentong nung NEP 2020 kübok FYUGP Course Structure dak sendakba nung Orientation ka densema liasü.

Shepe ayong metsünga alu raksatsüogo

Dimapur, Chiteni/July 9 (TYO): July 5 nü Shepe ayong ajungbena metsünga ajanga Longleng District kübok Yongnyah temeket nung Chingong aser Yongnyah yimtsüng nung alutem aika raksatsüogo. Tzünglu kanga sashia aruba sülen tzü ya ayaterem nung metsüng aser iba ajanga angotzübu tem apongtoktsüba den tsünüsenpongtstütem raksatsüogo.

Chingong Village council chairman Lungmei M-i ashiba agi, iba teraksatsüba ajanga yimtsüng anaprongla nung aluyimertem libaliro nung kongshiogo. "Küm pongu trok tain kozü, coconut, lichi, aser apple tetongtem timba raksatsüogo," ta Lungmei-i ashiba den süngtong atemba mapang senotsü intokba aser iba ya anepaludang mapang

intokba indang lemsatapa liasü.

Paisa, tang sorkar inyakyim balala benoka inyaka aliba indang süoki ia bilemba lemsatap. Pai ashiba agi, tzümetsüng agi kongshiba alutem ya tawa Rural Development Department kübok National Mobile Monitoring System (NMMS) indang 1 aser 2buba phase nung geotagged süogo. Tang teraksatsüba adokba ajanga iba sentong kübok phase 3buba aser 4buba atema tetsükdaksü adoker. Iba dak sendakba nung Lungmei

sorkar agency tem dang ken o ya kanga junga bushisüngdang takaratiba nung lendong agi kongshir aliba aluyimertem nem compensation agütsütsü mepeshia metetdaksüogo.

Alu raksaba den külemi tzümetsüng agi shishilembatsü atema tongtimbang apu raksaogo aser iba ajanga yimdaklirtem senzusenpong nung tetsükdaksü adokogo.

Ken o asadanga sülen alu aser angotzübu aponger aoba ajanga takoksa sen lakh 15 shi adokdaksüba asatetogo.

Kohima DC-i tetuyuba agütsü

Dimapur, Chiteni/July 9 (TYO): Kohima Deputy Commissioner-i sangdong ka ajanga, KMC dumping site tejenba nung lenmang kanga mejungi akümba aser toll tax gate (Welcome to Kohima Gate), tejenba anasa anentsüh maneni aluba apir, nüburtem kümzüka toktsütsü atema tetuyuba tasen magütsü tashi National Highway-29 kübok iba lenmang nung tetsüng trok aketba khu abenba gari dang senzüdaksütsü ta metetdaksüogo.

Yaongyimchen Mongti-Amlung semzüko

Dimapur, Chiteni/July 9 (TYO): Yaongyimchen Mongti-Amlung (Meeting Arena) July 8 nü MLA and Chairman DPDB Longleng, A. Ponshi Phom-i semzüksüogo, koba yimtsüng asoshi alizüng tasen ka tongtetba asütsü.

Iba sentong nung Director, DUDA, T. Wait Aier aser Deputy Commissioner, Longleng, W. Manpai Phom, natia shilem agia liasü.

Sentong nung o jembiba mapang MLA Ponshi-i, yimtsüng nung lenirtem aser yimtsüyimbu temi nendaka bendanga agüja inyakba atema

tenüngsang agütsü aser ashiba agi, iba ajanga Mongti-Amlung (Meeting Arena) ya takok ngua yanglutetogo.

Paisa, ali kiburtem shirnoki tela agütsüogo parnok dang aser yimertem shirnoki kisüjensü nung teyari agütsüogo parnok ajak dang pelaba lemsatap. Lenirtemi kodang nendaka inyakdir idangjiang terenlok alitsü ta ashiba den lokti terenlok atema ochishia inyaksü koda tongtimbang iba indang lemsatapa liasü.

Kasa mapang nung o tatsüka jembiba mapang Dr. T.

Wati Aier-i, Department of Under Developed Areas (DUDA) indang inyakyimtem metetdaksü.

Pai Yaongyimchen nung alirtem dang Under Developed Areas Programme (UDAP) scheme kübok iba project meshizüktetba atema MLA, A. Ponshi Phom nem tenüngsang agütsütsüla ta ashi. Maneni pai yimtsüng nung alirtem dang Yaongyimchen aser Longleng District ya tarutsü nung alima penzürttem mongjen ka kümdaksütsü nükla yur arem shiruru aser süngtolitongtem wazüka ayutsü ajungshia liasü.

SDRF-i teküzmükba maparen takok ngua inyakogo

Dimapur, Chiteni/July 9 (TYO): Dimapur kübok tesem balala tzü agi metsünga sülen State Disaster Response Force (SDRF)-i tzü agi metsünger aliba kiyong balala nung teküzmükba maparen takok ngua benoka inyakogo.

July 8 nü teküzmükba maparen benoka inyakba mapang Dimapur kübok lendong nung aliba tesentem nungi tetsür 29 aser tebur 31 densema ajak senteper nisung 60 küzmükogo.

SDRF team temi anepdang 6 ako nung Lengrijan (Ao-khel) Dmp nung teküzmükba maparen tenzüker aser iba tesem nung nisung 14 (tebur 10 aser tetsür 4) kümzüker. Iba sülen Immanuel College, Lengrijan

Dmp nung nisung asem kümzüka liasü.

Maneni team-i United Colony, Half Nagarjan Dmp nungi nisung 5 anin, Vihume Colony Dmp nungi nising 14 aser Medical Colony Dmp nungi nisung 4 takok ngua anina liasü.

Teküzmükba maparen ya maneni 11:30 ako nungi Sema Khel, Notun Bosti nung tenzüker aser iba mapang nisung pezü kümzüka liasü. L.R.C. Notun Bosti nungia tetsür 7 aser tebur 9 densema nisung 16 kümzüker.

Iba inyakyim ya 2:00 ako nung tembang aser nisung asüba osang kecha mali. SDRF team-i mapang shitak nung jenjang tapet agiba atema parnok nem tenüngsang agütsüogo.

NEZCC-i Guru atema application jaoker

Dimapur, Chiteni/July 9 (TYO): North East Zone Cultural Centre (NEZCC), Dimapur-i, Financial Year 2025-2026 atema Guru Shishyas Parampara Scheme kübok Guru ama shimtsü atema temsüa aliba candidate tem dang application benoktsü metetdaksüogo.

Candidate temi, sobaliba kenten, tsüngsang, yong aser arr amshia teka mapa balala, folk theatre, süng mapa, mask yangluba aser tanga sobaliba inyakyimtem densema parnok aliba tesem mesüra kin sobaliba shisatsü aser tajangshiba bena alitsü

nüngdaker.

Applicant temi parnok indang biodata aser credential tem Director, NEZCC, Post Box No. 98, Dimapur-797112 dangi yoktsüla. Applications ya email; nezccdimapur@yahoo.co.in ajanga yoktettsü aser copy ka Director, Art and Culture, Government of Nagaland nem agütsütsüla.

Application benoktsü atema tatembangbuba anogoji July 31, 2025 asütsü. Osang tejangjaba agütsü atema applicant tem dang www.nezccindia.org.in (http://nezccindia.org.in/Home/Advertisement semdangtsü metetdaksüogo.

Phek Disha senden amentsü

Dimapur, Chiteni/July 9 (TYO): Phek Deputy Commissioner-i sangdong ka ajanga, Phek District atema District Development Co-ordination & Monitoring Committee (DISHA) senden July 15 nü 11 ako nungi tenzüka DC Conference Hall, Phek nung amentsü ta metetdaksüogo. Iba senden

nung züngsemtem ajak tamakok maludaksüi arua shilem agütsü mepeshia metetdaksüogo.

Iba dak sendakba nung Deputy Commissioner, Phek, Rhosiethe Nguori, NCS-i line department ajak dang Ministry balala indang programs/scheme tem benoka inyaka aliba indang osang tejangja bener arutsü metetdaksüogo.



SHG livelihood Maparen nung takok ngua Nukshiyim (Yaongyimsen Compound) nung AGRO Friendly teyari ajanga "Waste to Product" Omen nung ajemdaker Banana Fibers Extraction Machine ka bener arua temekut yimtsung tem ajak ajangzüksü nukjiding nung, Nukshiyim Council Chairman R. Nukshl aser Pastor Imnatemjen Nukshiyim Baptist Arogo den CCA member arua July 7 anogo nung kanga takok ngua amenokogo.

Apu ka chirepba lendong nung 9 asü



July 09, 2025 anepdang Vadodara nung Mahisagar ayong tepdanga yangluba Gambhira apu chirepa aliba noksa nung angur. Iba apu ajanga Vadodara aser Anand na sendakteper.

New Delhi, July 09 (Agencies): Bodhbarnep Gujarat kübok Vadodara aser Anand na sendaktepba apu ka chirep.

Gambhira apu ya Mahisagar ayong tepdanga yangluba apu lir.

Iba lendong atalokba mapang nung truck ka aser tanker ka apu nungjagi ayong nung tzük.

Iba lendong nung nisung 9 asü aser nisung pongu kümzükogo.

Gambhira apuji state highway nung lir aser iba apuji

anepdang 7:30 ako meta chirep, ta ketdangsertemi metetdaksü.

Vadodara district kübok Mujpur nung aliba apu yagi Anand district kübok Mujpur aser Gambhira na sendakteper aser Central Gujarat nungi Saurashtra sendakteper.

Vadodara nung District Collector, Anil Dhameliya-i, "Tang kümzükba maparen teinyakdak. Ajungbena iba apu chirepdang truck ana, Eeco van ka, pickup van ka aser auto-rickshaw ka ayong nungji tsük," ta metetdaksü.

Tang tashi nung nisung

pongu kümzükogo aser kümzükba maparen maneni inyakdar, ta Padra police inspector Vijay Charan-i metetdaksü.

Paisa, "Yirua alirtemji Vadodara district nung local hospital-i anir ogo. Anepdang 7:30 meta apu chirepdang gari pezüji ayong nungji tsük," ta metetdaksü.

Iba osang angashiba sülen Ato kilonser Narendra Modi-i tejashi lemsatepba den külemi takoksa angur kibong shia nem sen crore anana agütsütsü sangdong.

Air India tayimtsü tsükokba report July 11 nü sangdongtsü

New Delhi, July 09 (Agencies): Taoba ita Ahmedabad nung Air India tayimtsü tsükokba sülen bushisüngdangba mezügbuba report Hokolbarnü (July 11) nüburtem dang sangdongtsü.

Tesüiba küm 10 tsüngda tayimtsü lendong tulutibaji Ahmedabad nung atalokba ya liasü.

June 12, 2025 nü Air India tayimtsü anünglen süklep 650 tashi atuba sülen alileni alua tsükokba lendong nung tayimtsü

nung mena alir 241 aser ali nung alirtema aika asü.

India Aircraft Accident Investigation Bureau leniba nung iba tatalokba kuli bushisüngdangdar aser Mongolbar nü ang parnoki sorkar nem bushisüngdangba mezügbuba shilem report agütsüogo. Iba lendong atalokba sülen India sorkari osangbenertem senden ka dang ayongzüka agi aser iba senden nungji tasüngdangbatem kecha melangzü.

IAF indang raraba tayimtsü ka tsükok

New Delhi, July 09 (Agencies): Bodhbarnü Rajasthan kübok Churu district nung Indian Air Force (IAF) indang Jaguar raraba tayimtsü ka tsükok, ta ketdangsertemi metetdaksü.

Jaguar fighter jet nungji pilot ana mener Suratgarh air base nungi apusoa liasü. Iba lendong atalokba sülen iba tensa asadangtsü aser kümzükba maparen inyaktsü atema iba tesem jagi police team aika

yoka liasü.

Iba lendong nungji pilot anaprongla asü, ajisiüka kiojen raksaba osangbo mali.

Indian Air Dorce-i X ajanga, "Bodhbarnü Rajasthan nung Churu anasa IAF Jaguar Trainer tayimtsü ka training mission mapang nung tsükokogo. Iba lendong nung pilot anaprong kanga mejungi yirua süogo. Kiojen raksaba osangbo mali. Taküm ana samaba...



uly 09, 2025 nü Patna nung Congress lenir Rahul Gandhi aser CPI (ML) Liberation General Secretary, Dipankar Bhattacharya na den tangartemi 'Bihar bandh' longkak aitba mapang osangbenertem den jembiba noksa nung angur. Bihar nung Special Intensive Revision (SIR) tetuyuba anema opposition INDIA teloktepi iba sentong ayongzü.

Tanurtemi anogo shia phone/TV screen nung ghonda 2.2 indoker

New Delhi, Chiteni/July 09 (Agencies): India nung arrshi küm 5 ser tekübok tanurtemi anogo shia phone/TV screen nung ghonda 2.2 shi indoker aser ibaji latetja aliba mapang dang nungi anasü lir, ta study tasen ka ajanga metetdaksü.

Arrshi küm 2 ser tekübok tanurtem 'screen time' ji anogo nung ghonda 1.2 dang asütsüla saka kokra ibajia khenyongi paidoktsüla, ta AIIMS Raipur nungi Ashish Khobragade aser M Swathi Shenoy nati study ka ajanga metetdaksü.

Shenoy aser Ashish nati tanur 2,857 nung ajemdaker study 10 shisadanga liasü.

Screen nung mapang kanga tali indokba ajanga tanurtem oshi ashiba anüa kümdaktsür, azüingba menoa angazüker, skill development nung kongshir, temang touzük tali kümdaktsür aser amoi aoba mapang raksatsür, t akasa study ajanga metetdaksü.

Screen nung mapang tali indokba ajanga takoksa balala anguba ajema kümdaktsütsü

atema kidang technology maliba zones alitsüla, screen nung rangloksü atema mapang lateta yutsütsüla, parnok den saisapongtsüla aser parnok den o jembiba nung mapang indoktsüla.

Felix Hospitals nung chairman aser tanur specialist, Dr D K Gupta-i, "Arrshi küm 5 ser tekübok tanur shilem 60-70 bo mobile phone, laptop mesüra TV reprangba nung mapang kanga tali indoker. Ibaji ajanga temang nung timtem balala adokdaktsür. Tsüraburtemi chirnur screen time lateta yutsütsüla," ta metetdaksü.

"Mezüngbuba nung, tsüraburtemji tanurtem atema tesayur kaka küma kidang screen nung mapang indokba ajemtsüla," ta paisa metetdaksü. Ano doctor kati, "Tsüraburtemi phone amshiba nokdangba agi arrshi küm 10-12 tsüngdapur tanurtem aika kodamesüi akümba (restlessness) ni metetogo. Parnok kanga jashir aser yimya kanga melenshir," ta ashi.

Sorkari taküm süngdong cr. 52 atemtsü: CM Yogi

Ayodhya, July 09 (Agencies): Taküm Uttar Pradesh state sorkari süngdong crore 52 atemtsü, ta Bodhbarnü chief minister Yogi Adityanath-i metetdaksü.

Tesüiba küm 8 tsüngda sorkari süngdong crore 204 atem aser tanü tashi süngdong shilem 75 bo taküm lir, ta paisa metetdaksü.

State tesem ajaklen süngdong atemtsü atema campaign ka agiba sülen osangbenertem den jembidang Yogi-i, Union ministry of environment, forest & climate change survey report ajanga Uttar Pradesh nung süngdong aliba litsüji acre lakh 5 lir ta shiogo, ta metetdaksü.

"Iba tetezü asenok heatwave nungi green-wave agi melenogo, aser tarutsü nung asenoki alima kümzükba nung shilem tulu agitetsü," ta paisa shisem.

Bodhbarnü chief minister Adityanath-i Ayodhya kübok Rampur Halwara yimdak Dashrath Path nung süngdong temtsüba sülen 'selfie' tangoka liasü.

Süngdong atemba mapatong ya 'Ek Ped Maa Ke Naam' campaign shilem ka lir.

Chief minister-i Ayodhya semdanga mezüng Hanumangarhi tekülem kidang state nung yimjung aser azükaru atema sarasadem.

Chief minister-isa Uttar

Pradesh nung nüburtem atema sarasadamba sülen Ram Lalla nung sanctum sanctorum-a semdanga liasü.

Ram Janmabhoomi Teerth Kshetra Trust ketdangpurtemi tekülem ki tesüdak osang pa nem metetdaksü aser tarutsü nung teinyaktsü mapatema metetdaksü. Ayodhya nung aliba Maharishi Valmiki International Airport tonga aruba mapang nung district ketdangsertem aser lenirtemi Chief Minister agizüka liasü.

July ita nung tang mezüng chief minister-i Ayodhya semdangar. June 5 nüa pai Ayodhya semdanga Ram Darbar tekülem ki semzükba sentong nung dena liasü.



July 09, 2025 nü Windhoek, Namibia nung aliba India nungertemi Ato kilonser, Narendra Modi agizükdang tangokba noksa nung angur.



TIR YIMYIM YIMOBILEM (EDITORIAL)

DIMAPUR

YANGTEPNÜ

CHITENI 10, 2025

Bendang limai aoba tajangzük

Tang Nagaland Chief minister-i anir Nagaland nungi parnok tongtibang nisung ishika Japan yimtiba Tokyo tashi orr Japan nungertem teyari agia Naga nunger lanurtem ajangzüksü asoshi sentong renema jajaba jagi memenui Nagaland nung lanurtem ajangzüksü imlar. Atangji, iba ama kin o kin na tsüngda mapa dang masü saka oshi dena angazüktepba jagi Naga nungertem dang masü saka Japan nungertema ajangzüksü. Alima nung timtema alirtem asoshi bendangleni teyari yokba aser bendanglen nungi teyari aruba temeim mapatem dak alaka kin o kin na mesüra linük o linük na tsüngda tangatetep nung inyaksü sentong renemba mapatem nung shingaia pei asoshi tajangzük melira kecha meinyaksü. Aji oda, asen lima nung tangar bendanger government asüyonga mesüra company asüyonga külemi inyaksüba sentong renemer aruba purtemji asen yaritsü kisüng bilema arur masü saka parnoka ajangzüksü asoshi bilema arur. Ibaji kodang asenoki angatetdir, asenokia parnok makoksatsüsa aser tezü matangtsüsa asen mapa nung nendaka aser ochishia inyaksü. Atangji, shibasüdir süaka, bendang sema alima repranga jajaba ya tajangzük tulu lir, kechiyong tangar yimitem merüka ayuba kija angu nunga asenok asoshibo mapa tasen ka angazüker asütsü. Kasaji, bendang lima nung tangar alu ayimba, shiruru metsüba aser anogo shi asenoki amshiba osettsüsettem yangluba mapatem inyaka angubajia asenok asoshi tangazükdkak school tajung ka nung aden amai asütsü. Aji oda, akok tashi yimten yimsüsürtemi anir government nung ketdangsertem, tesayurtem, shishilembartem, aluyimertem aser kaketshirtem shiai bendang lima sema jajatsü jangratsüla aser nisung aikati pei sen agibo bendangleni moutettsü asünungji, government-i teyari agüja mapang mapang shia telok telok bendang lima mapa tapu balala repranga jajatsü yoktsüla. Atangji, government sen endoka bendang limatem repranga jajabaji shingaia kazüa senzür amai mebilemtsüla mesüra shishii aoer a masü, saka meyipa aruagi asen lima nung langka tajung kabosa inyaksü asoshi tangazüki aoer ta khuretsa bilema jajatsüla. Tia majung kaji, aiben asenoki government mesüra arogo sen endoka bendangleni aoba ya bendang lima reprangi aoer amai bilemer, anungji bendang limatem nung inyaka anguba mapa tajungtem angazüka bener arua asen lima nung inyaksü melen, bendang lima repranga jajartemi bendang limatem nungi angazüka bener arua asen lima nung inyakba mapabo mangur. Aji oda, bendanglen bendangertem dang nungi angazükba aser anguba mapatemjisa nübortem nem tangazükba aser tangatetba tasen agüja len sayutsü melen, ashiko, bendang semer sema jajartemi pei lima atongdangbo amadoker atonger südi. Iba amaji ka masü nungbo bendanglen nungi tayimtsü nung arudang asen meyong tanentsü anendak ngur temulung shiranga bilemtsü aser bendanglen anguba tayimtsü anendak amato yangludaktsütsü. Kasaji train nung arurtemia asen lima nung akaba train station aser train station lenmangtem ngur peisasa tejak metentet bilemtsü aser idangjisa yanglushinüa aitsü. Kasaji, bendang lima nungi meyipa arur asen yimten yimsüsürtem asen yimitem sema jajadang komaka bilemer ? Aji kanga tongtibang asütsü. Tesasatsüka, asenoki bendangleni nisungtem yokdang, aluyimtsü angazüki aluyimer meyoker aser shishilembaba mapatem reprangtsü atema shishilembartem manir . Aji oda, asen lima nung meyipa aruagi alu ayimtsü atema aluyimer yoktsü melen IAS officer ka yok nung ajungtsü na ? Mesüra minister aser MLA tem yok nunga ajungtsü asü ? Mesüra aluyimtsü angazüki pastor-ba yoktsü na ? Tanübo asenoki parnokji dang yoker, saka parnokji meyipa arur alu mayimer aser aluyimertem nema aluyimtsü jangradakja len mesayuteter, kechiyong parnokji aluyimer masü, anungji parnokji tai masü saka teyoker tai asütsü. Itemji angateta, tanübo bendanglen government sen endoka kazüa mesenzüi, shitakba mapa angazüka inyaksü purtemang shimteter yoktsüla. Iba jagi asen lima ya mapa inyakba lima ka kumadoktsü.

OLEMSABANG

Aor Tar Yimsüyimbong

Wt. Repabenla, Asst. Professor, FAC

(Maneni yashi adok nungi...)

5. Asüyim

Tar nunger otsü nung tasür aliba lima ka lir ta parnoki amang. kibong ka nung jabaso ana toktsür kodang tetsü o tebu na asü, temeimtsü tanur anaji anogoshia alu inyakisa ao. Saka tananep aodangbo tenadi inyakba wadang dang nungibo tuluba inyakersa angu. Anungji, iba ya shirnoki inyaksürar metettsü ta sür adianu anaji ammanng arudang jendang atsüka ata



alinung asü lima nungi tetsü o tebu tena arua aluji inyaksü. Anungji, teti o tenu naji jembiteper teti-i tebu dak aser tenui tetsü dak ta azüit, saka tebubo perepzüker jena ao, tetsübo meperepzükteti asü lima tashi tanur tanubusangji anir ao. Iba mapangji asür pongzü asaba mapang denji. Idangji asürtemi akümliba na alidagi pongzü arutar ta ayimoktsü, anungji pai reprangzüka yok nung metong talak nung sürapong tila ka temer aliba pai angu. Iba jagi tanü tashi nung iba sürapong dangji asür pongzü ta ajar. Ano na-a züangi ya chiang tasür ai tasen ka dak atangba tejang tila ka agütsü, anungji iba dangji tanü tashi nung asür züangi ta ajar.

Aji oda, Tar tensa tatalokba kuli balala agi asü lima ka lir aser idakji asenok nungi jilia aobapurtem alir ta amanga liasü. Anungji, tanü tashi asen Aor asüdang nisung aikadi na Meyutsüngba kilem kodang tongdir molushia oa ne tenüng shia 'nai ni alimai yokba mapa ajak temer tanü ne dangi tanaben meyipba arur' ta shiang ta jembir.

6. Obendangdak

Tar yimsüyimbong nung Meyutsüngba tsüngrem dang ya obendanger tsüngrem ta aja. Nisung ka akümüli nung mapang kopika lidir ibaji Meyutsüngbai atemzüktsüba tasa jembia aru. Akümüli nung nisungba jagi mapa tajung majung kechisa inyaker iba nungi pai o bendangtsü ta amang. Anungji, kodang nisung ka iba ali wadang tembanger süatokdir indang indanga Meyutsüngba kilemi aor aser par kilem nung süngtidong nungji teburi nü agi aser tetsüri süatakdang amshiba ale magi atsüngtsü. Shirnok alima nung ochishia merükteta ali parnoki iba süngtidongji indang indanga tsüngshir, saka akümüli nung ochi mashirbo süngtidongji metsüngshir ta amanga aru.

Kodang nisung ka asü limai odir ken yamai tena ao;

Meyutsüngba o
Nüki lemlemtsüti ni,
Yangyang yuashiba,
longmiamong worto,
takhu shilangtalini.

Meyutsüngba nai alimai sempet tajung bener yokbato tanü ni ano ne dangisa meyiba arur ta atenba ken lir. Nisung ka alimai arudang sempet balala bener yoker saka shiri iba sempetji junga mamshir parnokbo temerenshi tulu angur ta jembi. Akümüli dang nisung kari tangar indang an miima chitsüra Meyutsüngba matsüngdang miimbanga meyuteti süpok nungi miima an tetsünga jozüka alur ta jembia aru.

Ano alima nung taküm lia ochi obendangtsü atema tiar dangisa ao. Tatishitsü agi, nisung dak auyaba mulung melema lira, iba kuliji bener tiar dangi aotsü yangji nisungba tenüng nung amji temerük ana atatepa yur yangji jang tera inoktsü aser aji chitem ama tema ayutsü. Aser putir jagi atakatema shiba ochi aser shiba tiyazü nai o bendangjang ta jazükdang tsüngsak mopung ka arua idakji süia aotsü. Ajisür külen chitem temer alibaji sala reprangtsü, idangji jang nungji anak ia lira na tai ta shia aitsütsü, saka mezüng ayuba amato temerük lira paji metentsütsü ta o bendanga aru.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'Palestine Action' pusemba atema putir ka densema nisung 29 apu



Arrshi küm 83 putir, Rev. Sue Parfitt pua anir aodang tangokba noksa nung angur.

July 09, 2025: Taoba hopta London nung 'Palestine Action' telok pusema longkak aitba mapang nung arrshi küm 83 Khristan putir ka densema nisung 29 apu.

Bristol nungi Rev. Sue Parfitt-i longkak aitba sentong nungji 'I oppose genocide. I support Palestine Action' ta zülua aliba ozülü ka amer mena lia Terrorism Act kübok la apu.

Honibar ayaterm nung sorkari Palestine Action ya kiralongrar organisation ka ta sangdongogo. Anungji tang nungibo Palestine Action pusembaji ozüing alema aibelen ka lir, aser aibelenertem küm 14 tashi tepuokdak ayutsü akok.

Taoba ita Oxfordhire nunga parnoki RAF Brize Norton nung tayimtsü ana raksaja liasü.

Palestine Action ta zülua aliba tola asemertem-a ita trok tashi tepuokdak ayutsü.

Taoba mapangtem nunga Rev. Parfitt semerben (30) dak tali pua liasü, talisa lai Christian Climate Action atema inyakba agi apu.

2022 küm November ita nunga Glasgow nung UN Climate Change Conference jakdang lai Insulate Britain campaign nung shilem agia M25 nung mener longkak aita liasü.

Taoba Honibarnü London nung police-i la pua anir aotsü lia lai, "Ni Palestine nung nüburtem atema nokdaker, aser iba organisation ya kiralongrar organisation ta sangdongba ya khenyongi tim masü. Iba linük nung asen temeden aika samadar," ta ashi.

Rev Parfitt ya 1994 küm ordain süa liasü, ajisüaka yaküm British Library nung 'Just Stop Oil' longkak aitba sentong nung lai shilem agiba sülen la dang nungi Permission to Officiate (PTO) agiena liasü.

Taküm April ita nung osangbener den jembidang Rev Parfitt-i, "Meimchir taküm ya Tsüngremi melungba ama tashi angatsü atema lir. Tainba-tainba akümdang takümji tajungba dang akümer, kechiyong Tsüngremi asen tamang benschitsü atema tesüngmangtsü maongka aika agütsür. Ni Tsüngrem dang pelatsü aika lir, kechiyong nütsüngtsüba, tenzükba aser temeim mapa inyaktsü atema Tsüngremi maneni lenmang tasen sayur," ta ashi.

Candace Cameron-i tetsürtem atema 'Devotional' kaket ka saya



Candace Cameron Bure

July 09, 2025: Actress Cameron Candace Bure-i tetsürtem atema 'devotional' kaket tasen ka sayaogo; anogo apen tetsürtemi Lai azüngba aser tanela jenjang meyipa reprangshiba ajanga Tsüngrem den sendakteptsü aser taküm nung tepela aser tashi angutsü nükjidong nung la iba kaket ya zülü.

'100 Days of Joy and Strength: A Daily Devotional Journey' kaket sayaba sülen osangbener den jembidang lai, "Devotionals ya mapa kuma

inyaktsü atema lir aser iba ya Tsüngrem den sendakteptsü atema lir. Ni olong ana (tepela aser tashi) ya tetsürtemi Kibuba nung tepelaji kü tashi. Iba ya Nehemia 8:10 nungi lir," ta ashi.

"Iba kaket ya, taküm nung timtem balala ajurudang pei kija ama bilemertem atema lir. Anogo shia taküm nung tayongzükba balala ajurur. Asüngsashitsü, nükjidong asentenshitsü aser Tsüngrem asen den lir ta asen sasa nenshia metettsüji tongtibang. Pai

asenok kodanga metoktsür. Asenoki Pa den jembiba ajakji Pai angashir," ta lai ashi.

Laisa, iba kaket nung tanela jenjang meyipa reprangshitsü, Lai tekongtem aser tools aika lir, aser ibaji ajanga tetsürtemi Tsüngrem den taneben sendakteptetsü, ta ashi.

"Na tanur tila tsürabur ka süaka, tejashi nung liaka mesüra timtem nung liaka, nai iba kaket lapoka anogo shia minute 10 indoktsü akok, aser ibaji ajanga nai Tsüngremji shibar nenshia metettsü," ta lai ashi.

"Kechiba, ta asüba ya ni metetner. Kechiba asenoki langka inyaker? Kechiba asenoki ibaji metettsüla? Ajakji Laishiba dangi meyiper. Asenoki kar dang langa tesayuba agütsüra ibaji ochi nung ajemdaker asütsüla, aser ochiji Laishiba nungi lir," ta lai ashi.

Laisa Kibuba nungi tepela angutsü atema lai anogo shia Laishiba azünger ta ashi.

"Kibuba den mpaang indokba ajanga tepela angur. Anogo shia tepelaji balala asütsüa akok, ajisüaka Kibuba O nung tera yanga alitsüji tongtibang. Kü tepelaji Kibuba nungi süra ni Kibuba tali metettsü nüngdak," ta lai ashi.

ANOGO ABEN TSÜNGREM DEN

Tanela agi mapa inyakertem

"Kibuba tanela, shisatsü aser tangatetba... .. teshisadang... tashi... temetetba aser tetsübu"
(Isa 11 :2)

Tanela Temeshi-i asen mapa, tejangraba aser taküm mapa ajak nung yarir. Pai asen mapa nung koda yarir tanü lesson ka reprangdangdi.

Asangur Yosef bendanger lima nung liasü aser Pa tamang anemertem liasü. Ejip nungeri pamok temeket reprang (Ani. 2; 11, 12) saka Yosef-i azüklen reprang. "Tsüngrem anema ni koda temenen menatsü?" (39:9). Pa dak tenük merem aser tesempa lijakjang agi aka, saka pa lijak kümküma liasü. Kechiaser Tsüngrem Tanela pa dak liasü (Lip. 49: 23-25; 41:38). Pa tepuodak nungi tetushi nung chuba kidangi aru. Daniel a Tsüngrem tanela akaba asangur ka liasü (Dan 5: 11; 6:3). Pa Babylon chuba tenzükba mapa nung liasü. Pa dak a tenük meremer liasü. Ajaki pa sendok. Daniel-i pa kija nokdak, ali chuba aser shiruru metsübu. Mapang shia pai Tsüngrem dang apudak. Tsüngrem Tanelai pa tasü itdaktsü. Anungji pai pa tamang merakzüi Tsüngrem memetetba chuba ana tenzük (6:28).

Tanela agi asüngba doctor kati tajungba operation agitsü; Tanela agi asüngba engineer kati tajungba yanglutsü; tanela agi asüngba tesayur kati tajungba sayutsü aser tanela agi asüngba student kati tajungba azüngtsü.

Tanela agi asüngsashia kümang aser Tsüngrem tenüngsanga tenzükang. "Ya anisüngzük lir, aniseta alisang nem nenoki anisüngzük agüjang..." (Isa 28:11:12; 1 Kor 14:21)

Anepdang, nikongdang aser teruto ajak nung Tanelai onok taküm akaasodakjang.

Impur nung Asen Atepzüng Tiptemdi sentong agi



Impur, July 9, 2025 : ABAM WM ajanga maneni Zone 1,2&5 Tenzüklatem Asüngsashi Sentong "Asen Atepzüng Tiptemdi" Esther 4:16 omen sür Impur nung July 8,2025 anogo kanga temoatsü ngua agiogo.

Rev. Temsü Jamir, Executive Secretary, ABAM ajanga tayongzükba O jembidang, tanü asen kibongtem nung tipmatem ulura alibayong kija, kibong aser lokti ajak nung tiptem meli temeneni atsür aoba angur. Kechiba amitsür timba akümer?

Kechiba teburtemi tamangba yimsü sendoker? Ochimashi kong nungi adoker? Item tasüngdangba ajakya asenoki telangzüba reprangdangra pei atepzüng nungi adoker. Tanü rongdak nüngdak ji pei atepzüng merüktettsü mapa ya lir. Iba tiptemba ji kibong nungi

tenzükba ajanga lokti ajak nung tiptema alitsü. Anungji, Asen Atepzüng Tiptemdi ta asüba sentong ya khen agiba sentong ka ama masü saka metangi ka nungi ka nem tiptemtsü tangatetba agütsüba yimyim südi ta tayongzükba tulu agütsü.

Iba sentong nung tongti O jembir Mrs. T. Arenla Lkr, Secretary, ABAM WM liasü.

Tsüngrem O jembiba mapang nung, asenoki pei taküm telungtiba nungi asen mokokmein jangja janga mereprangtetra asenok kibong nung jana kodanga mepilatsü. Anungji asen telungtiba nungi asen taküm reprangshia merükteta tiptema lia tesem ajak nung teküzmükba bener arudi ta ashi.

Ajak agi arogo 58 nungi tenzüklatem 571 arua iba sentong aden liasü.

AO OSHI ANGAZÜKDAK:
TANÜ ANGAZÜKTSÜBA OJANG



Tepuokdak

(n) ozüing raksartem ayuba ki (jail, prison)
* Tanü asüingbo tepuokdak nisung aika tajung küma melenshir.

Tepuoker

(n) Tepuokdak alirtem (prisoner)
* Tepuokdak tepuoker rongnung nisung aika temulung meyip.

OLONG PAITEP # 7204

		1		2		3			4	
						6				
						7		8		9
				10						
11										
12	13			14						
15										

TIPILEN

2. Pelatepa watitepba - 7
6. Kibong yongsük - 5
7. Tekaraba nung - 5
10. Molunga langzü - 3
11. Akhidang aiürtem ayipdak - 5
12. Tebang nungi o jembiadok - 5
15. Tetemjen - 7

LANGTSÜNGLEN

1. Temang nungi aluba tzü - 7
2. Azü ajemba shiruru tila ka - 7
3. Taleptsü yin - 3
4. Azü__r - 3
5. O bangjema jembitet - 6
7. Lokti yimten anishiba yimya - 7
8. Okrong - 7
9. Mejanga oner - 6
13. T__n - 3
14. Ita ter ana - 3

OLONG PAITEP # 7203 TELANGZÜBA

TIPILEN :

1. Aben, 5. Menden, 6. Lenden, 7. Alet,
8. Ulu, 11. Ang, 12. Ajak, 13. Sabang,
14. Tenyar, 15. Tara.

LANGTSÜNGLEN :

2. Balala, 3. Ken, 4. Anogo,
5. Menungrar, 9. Tangar, 10. Lokti
13. San.

NAI-A YA METETTER MA



Mongolbarnü Madrid nung Archery World Cup 2025 stage 4 nung compound mixed team qualifying asayaba mapang Jyothi Surekha Vennam aser Rishabh Yadav nati otsü tasen ka yangluogo. Individual archery events qualifying round nung Yadav-i point 716 aser Vennam-i 715 ngua tena senteper point 1431 angu aser taoba mapang Denmark nunger Tanja Gellenthien aser Mathias Fullerton nati point 1429 ngua otsü tasen yanglur aliba ajatetogo.

Assam CM-i ali azüngtetba inyakyim pusema jembi

Guwahati, Chiteni/July 9 (Agencies): Assam Chief Minister Himanta Biswa Sarma-i, par sorkari tang sorkar ali atsünga alirtem mintoka ali azüngtetba inyakyim pusema jembiogo, aser ashiba agi, ali azüngtettsü atema jelia osang agütsüba ya iba inyakyim nung taochi sayuba mapang ka lir. Paisa, nüburtemi iba amala osang agütsüba sentoka toktösüra ketdangsürtemi machinery amshia sorkar ali atsünger alibatem merektettsü, ta tekümdangtsü metetdaksü.

Chirang nung Bodhbarnü BJP district office tasenba lapokba mapang Sarma-i osang benertem den sensak asem aser Dhubri district kübok Bilasipara-Chapar tesem nung ali atsünger aliba merektetba dak sendakba nung sorkar tamendakdak aser yimden yimsüsüba tsütsü tasa naprongla metetdaksüogo.

"Nütsünyongsük shilem 90-i iba inyakyim ya pusemer. Nütsünyongsük shilem 10-i dang iba ya anemer aser onoki inyakyimtem yimjung nung benoka inyakdar," ta pai ashi.

All Assam Minority Students' Union (AAMSU)-i sorkar inyakyim ya mimchir dak mebenshitsüba inyakyim ka ta shia aitsüba dak sendakba nung Sarma-i telangzüba agütsüogo. "Jelia osang agütsüba dak alaka tanga taochi sayutsü tuluba mali. Iba sülena kari danga ozüing alema atsünger aliba ali toktösütsü memulungra onoki machine amshitsüsa akümtsü," ta CM-i ashi.

Paisa, AAMSU-i iba anema "militant movement" ka amenoktsü amokmarenba sülen tekümdangtsü metetdaksüogo. "Nenoki militancy lenmang shimra onoki militant telangzüba ka agütsütsü," ta pai ashi.

Chief Minister-i ashiba agi, iba inyakyim ajanga industry terenlok atema lenmang lapokja iba tesem ajangzükdaktsütsü, koba iba tesem nung alirtemi mapa aser infrastructure terenlok asoshi khanga arudar.

Bodoland Territorial Region (BTR) nung Kajalgaon sendangba mapang Sarma-isa, takok angutsü ta jangjar aliba tesemtem nung dang BJP-i candidate tem yoktsü ta ashi.

Paisa, party-i Udalguri dak alaka BTR district ajak nung office amenokogo, ta ashiba den, Udalguri nunga taruba ita ana tsüingda office yanglu tenzüksü imlar, ta pai shisem.

Assam anüolen nüburtem aika pei talidak kidang nungi mintoka ali azüngtetba ajanga nüburtemi aika iba inyakyim aitsüba, court-i ken o asadangba aser sorkar aitsüba mapang ka nung CM-i iba olen ya lemsatepogo.

MHRC-i asangur chanu ka merenshiba indang report police dang meshi

Shillong, Chiteni/July 9 (Agencies): Meghalaya Human Rights Commission (MHRC)-i East Khasi Hills Superintendent of Police, Vivek Syiem dang, police ket nung yua aliba mapang arishi küm 19 tain asangur chanu ka kanga mejungi züka merenshi ta osang tema adokba indang report agütsütsü tetuyuba agütsüogo.

SP-i, hopta asem tsüingda July 31 nü tashi nung osang tejengja agütsütsü tetuyuba agütsüogo.

Getwin Jyrwa tetsü Mildred Jyrwa-i MHRC nem tashishiba ka agütsü. Lai ashiba agi, Meghalaya kübok Sohra Police Station nung ketdangsürtemi lar jabaso parnok ket nung yua aliba mapang kanga mejungi yiruttsü.

"Pa police station nung reshikangshia amshiba sülen chiok," ta asanguba tetsü yagi ashi.

MHRC Chairperson, Justice (Retd.) T Vaiphei-i Mongolbarnü ashiba agi, commission-i tashishiba ya Hombarnü agizükba sülen asadangogo aser iba anema jenjang agitsü atema kuli aika ngutetogo.

"SP-i bushisüingdang ajanga ngutetba dak ajemdaker onoki jenjang tapet agitsü," ta pai osangbenertem dang ashi.

Justice Vaiphei-i ashiba agi, tashishiba nung ojangtem kangabo mejangja, saka commission-i iba tatalokba ya meimchir temeden anema inyaksangshiba ka ama agir. Bushisüingdang metenzük tsüingda commission-i district police tekolakba dang nungi shitakba osang agitsü telemtetba agiogo.

MHRC-isa, parnok staff dang tashishiba shiti aser official tetuyuba ya SP nem ghonda 24 tsüingda agütsütsü tetuyuba agütsüogo.

Iba tetuyuba dak sendakba nung SP Vivek Syiem-i Hombarnü bushisüingdang ka tenzükogo. Pai Pynursla indang Sub-Divisional Police Officer Baialamphang Wanswett lenisüba nung iba bushisüingdang asütsü nongloktsüogo, aser hopta tatem tashi nungbo ken o jangjatsü imlar.

Tashishiba nung Mildred Jyrwa-i ashiba agi, ketdangsürtemi pa bushir ta angazükba sülen lai lar jabaso ya July 3 nü 9 ako meta Sohra Police Station-i anirao. Iba sülen nikongtsütsü tashi nungbo lar jabaso ya kanga mejungi yirur liasü.

Pa kanga mejungi yirur aliba ajanga lai pa Sohra Community Health Centre-i anir ao. Idakji aliba staff temi pa maneni temang anepalutsü atema Shillong Civil Hospital-i anir aotsü tetuyuba agütsü. Doctor temi Getwin ya Hombarnü mozükidang nungi yokogo.

Lenirtemi CM dang Khasi nunger yimtsüng 18 Meghalaya nungi mepiladaktsütsü mepeshi

Shillong, Chiteni/July 9 (Agencies): Ri-Bhoi nung Assam aser Meghalaya na arrtsü nung Synjuk Ki Rangbah Shnong Border Area (SKRSBA) kübok longjemer aliba yimtsüngtem nungi lenirtemi Meghalaya Chief Minister Conrad K. Sangma dang Raid Nongtung, Khyriem Syiemship kübok Khasi nunger yimtsüng 18 prongla Meghalaya kübok dang ayutsü mepeshia metetdaksüogo.

Lenirtemi CM nem local MLA Charles Marngar ajanga tezüluba nung takhangba ka agütsüogo, kong arrtsü nung aliba loktitemi timtem

ajangshiba shisema lir.

Takhangba nung Synjuk-i, iba tesem nung Village Employment Councils (VECs)-i MGNREGA scheme tem takok ngua benokba shisema lir. Ajisüaka senotsü mapang shitak nung manguba ajanga tang terenlok maparen balala bangdaka aliba indang tebilemtsü aliba metetdaksü.

Parnokisa, Jal Jeevan Mission (JJM) indang ken o metetdaksüogo aser ashiba agi, sen aika intoka inyakaka yimtsüng nung maneni tzü agi anünger.

Takhangba nungsa Mawlasnai nungi Jatalong,

Khyndewso nungi Sabuda, aser Thadrang nungi Khliehamwang tashi tongtibang lenmangtem jenjang kanga mejungi aliba indang shisema lir. Parnoki item lenmangtem ya nüburtem tesendaktep asoshi kanga tongtibang ta shia yangushitsütsü takhangba agütsüogo.

Maneni yimtsüng tekolaktemisa, nüjiso ngur küm aika aruaka yimtsüngtem nung electricity dena maliba süngmanga bilemba lemsatepogo aser sorkar dang Chief Minister's Solar Mission ajanga solar-powered lighting aser battery tem agütsütsü mepeshia liasü.

Trump-i Putin aitsür, Russia-i Ukraine dak tesashitiba amak



Kyiv, Chiteni/July 09 (Agencies): Ukraine linük tesem balala nung drones 728 aser cruise mesüra ballistic missiles 13 khaloktsüba sülen, Russia-i anünglen nungi tang tesashitiba makogo, ta Tir Volodymyr Zelenskyy-i ashi. Zelenskyy-i tang tesüsa amakba aitsü aser, "Yimjung asoshi kanga meranga inyaktepba mapang Russia-i item ajakji maneni rasatsür," ta ashi. US-i Kyiv dangi nok-nü tali yoktsü ta Tir Donald Trump-i ashiba sülen Mongulbar aonung Russia-i Ukraine ya amak. Taoba hopta ang US-i Ukraine nem nok-nü agütsüba soita liasü, koba Trump-ibo memetet ta US media ajanga ashir. Mongulbarnü US Tir Donald Trump-i Russia Tir Vladimir Putin dak tezü atangba indang lemsatepa liasü. "Nenoki ochi metetnera, Putin-i asenok dak tamagitsü jenti mereplochtsür. Pai teti asenok den yimya tajung amshia aru, saka tetetzü maka kumogo," ta Trump-i osangbener dang ashi.

Kremlin odongtar Dmitry Peskov-i ashiba agi, iba atema Moscow kanga süngjema lir. Trump-i teti o tesepra jembir, ta ashi. Lenir ana ya teti osangtsüsang agitepa liasü, saka Ukraine nung ceasefire alitsü atema mera tejangja kata magiteti lir - koba Trump-i anogo ka nung koktettsü ta shia lir. Taoba hopta Russia tir den phone ajanga jembiba sülen Trump-i pa kanga mepelar ta shia liasü. "Pai tanen makai nisung tepsetner, aji majung," ta Trump-i Putin indang ashi. Trump indang administration-i Ukraine nem mitkar tsütsü teyari agütsüba anena atatsü sangdongba sülena iba taitüsü ya arur. Ukraine nem mitkar tsütsü teyari agüja aruba anena atatsü temelaba ya US Defence Secretary Pete Hegseth aser Elbridge Colby, under-secretary of defence for policy nati agütsü ta osang ajanga ashir. Mongulbarnü osangbener temi iba telemtetba shibai agi ta

asüngdang dang, Hegseth den külemi mena alisang, Trump-i, "Ni memetet. Nai ang kü dang shiang," ta langzüa liasü. Iba telemtetba meyipshiba tetetzü Ukraine dangi Patriot missiles ter yoktsü akok, ta osang kar ajanga ashir. Russia-i missile aser drone amshia amakba nokdangtsü atema Kyiv-i iba interceptors dak metaloka alir. Mongulbarnü Trump-isa Russia den shishilempaba linüktem dang tariffs shilem 500 meshitsü bill Republican Senator Lindsey Graham-i benokba shisadangtar ta shia liasü. January ita US tir akumba sülen Trump-i Russia nem tenokdangba balala agütsütsü amokmerena arur, saka tanü tashi kata meinyaki lir. June ita pai Russia aser Ukraine tsüngta tezüngzüktep kar yanglushibo ta atar ta shia liasü. Ukraine anüdoklen aser Kyiv nung mapang shia amaker, saka Ukraine kinük-kisang ajunga Russia nungi jenbua mali. Lutsk yimti ya Poland den arütsü nungi kilometre 90 pilar lir aser ibai military aser humanitarian aid belenba tesem tongtipang ka lir, kong Mongulbar aonung amak. Anüolen Lviv aser Rivne yimtitem nunga ola tulu adoka apokba angashiogo. Ukraine-ia arütsülen Kursk region nung Ukrainian drone ka agi amakba nung nisung asem asü aser tenet yiru, ta Russian ketdangsür temi ashir.

Longkak aiter tashiyim agi azüoktsü Hasina-i mela

Dhaka, Chiteni/July 09 (Agencies): Toba küm Bangladesh nung kaketshir temi anir longkak aita aliba tashiyim amshia azüoktsü asoshi iba mapang ato kilonser inyaka alila Sheikh Hasina-i temelaba agütsü, ta lai phone ajanga jembiba audio ajanga kuli sayur. March ita online nung temai adokba audio nungya Hasina-i lar security forces dang longkak aiter anema "lethal weapons" amshitsü aser "parnok kong ngudir yangji injang khaloktsütsü temelaba agütsü. Bangladesh nung prosecutors temi iba recording ya Hasina anema kuli tongtipang ka ama amshitsü sentong lir, shiba special tribunal kati la meliaka nisung meimchir anema mapa tamajung inyakba indang ken o jembi tenzüka lir. Taoba küm meyi mapang iba mepetmesü nung nisung 1,400 shi tepset, ta UN bushisüngdang temi ashir. Hasina ya India-i jena ao aser la anema ken o benokba kata lar party-i magizüker. Lar Awami League party indang odongtar kati iba recording nung özüng alema inyaktsü tebilemba mesayur ta ashi. Hasina-i mejangjaba sorkar ketdangsür kati den jembiba audio temai adokba yagi lai sorkar anema longkak aiter dak akhatsü indang-indanga totuyuba agütsüba kuli tejangja sayur. 1971 nung nüchiso asoshi rarar kinunger nem sorkar mapa wazüka yuja aliba anema longkak ait tenzüka tuluba akum aser küm 15 yimsü süa arula Hasina ato kilonser menden nungiatsügdok. Ibai 1971 rara sülen Bangladesh nung azüdokshi tamajungtiba liasü. Iba mepetmesü tenzüker tamajungtiba ya August 5 nü, Hasina helicopter ka nung jena aoba anogo liasü. Iba anogo nüburtemi Dhaka nung lar ki sabang, saka la jena orr liasü. Phone nung jembiba tang temai adoka aliba ya July 18 nü liasü aser iba mapang Hasina ya Dhaka nung lar Ganabhaban kidang liasü, ta iba audio temai adokba indang tejangja meteta aliba osang ka ajanga ashi. Iba ya longkak ait tenzüker kanga tongtipang mapang ka liasü. Iba mapang police temi longkak aiter tepsetdang tangokba video social media balala nung lemsatepba nung nüburtem ain adokba nung security ketdangsürtemi telangzüba agüja liasü. Hasina-i phone nung jembiba sülen military-grade rifles tem Dhaka tesem ajungalen amshia liasü, ta police documents ajanga ashir. Ibai Sheikh Hasina densema aliba phone calls aika National Telecommunications Monitoring Centre (NTMC) ajanga agütsüba BBC ajanga asadangba nung dena lir. Iba call indang audio ya taküm March ita tetenzüklen temai adok, sakai shiba ajanga temai adokar mejangja. Longkak ait tezükba sülen

Hasina-i phone ajanga jembiba clips aika online nung temai adokogo, aser aika mejangjai lir. July 18 nü jembiba 'voice match' ya Bangladesh Police nung aliba Criminal Investigation Department ajanga medemdanga liasü. BBC-ia iba recording ya audio forensics experts Earshot den lemsatepa liasü aser parnokia iba audio yanglushiba kuli mongutet. Awami League odongtar kati, "BBC-i amshiba tape recording ya tejangja asü masüar onoki memetet," ta ashi. Longkak aiter tepsetba nungya Sheikh Hasina den taoba sorkar ketdangsür aser police tanishirtem dena sendaktepa lir. International Criminal Tribunal (ICT) ajanga nisung 203 anema ken o benoka lir aser item rongnungi nisung 73 par ket nung lir. BBC Eye yagi anogo 36 nung police temi longkak aiter dak tashiyim amshiba indang video, noksa aser documents noklang aika jangjatepa liasü. August 5 nü Dhaka kübok Jatrabari kiyong nung police-i nisung 52 tepsetba BBC ajanga bushisüngdangba nung jangjatet, koba Bangladesh puti otsü nung police-i azüdokshiba tamajungtiba alitsü. Iba anogo Jatrabari nung nisung 30 tepset ta osang balala ajanga shia liasü. BBC ajanga bushisüngdangba nung nisung aika tepsetba tetenzük aser tatemba tejangja kakteta liasü. Tenük kuli alirtem, CCTV aser drone nungi tangokba noksa bendenba nung, longkak aiter nungi police tem piladaktsüba army personnel tem ainshiba sülen police temi tapi agi injang khaloktsüba BBC Eye ajanga jangjatet. Minute 30 dak tema police temi jena oa aliba longkak aiter dak injang khaloktsü aser iba sülen police tem anasa army camp nung jenok. Ghonda ishika lir longkak aiter temi tayang kepzüka mapang police trok tepset aser Jatrabari police station nung mi senlokja liasü. Taoba küm July aser August ita azüdokshi nung shilem agiba atema police officers 60 pua lir, ta Bangladesh Police indang odongtar kati osangbener dang ashi. "Iba mapang police temi tashi tali amshiba tesasatsü tatalokba tem lir. Bangladesh Police-i ochi nung kanga junga bushisüngdang tenzükogo," ta odongtari ashi. Sheikh Hasina indang ken o taoba ita nungi jembi tenzükogo. Lai nisung aika tepsettsüsa totuyuba agütsüba aser civilian dak tenük yoker azüdoshiba aser rongrong-shirong adokdaksüba, nisung aika tepsetba menokdangtetba densema nisung meimchir anema mapa tamajung inyak ta ken o benoka lir. Bangladesh-i India dang la meyipa yoktsü mepishiba tang tashi mapa kuma meinyaki lir.

GOVERNMENT OF NAGALAND

OFFICE OF THE DIRECTOR GENERAL OF POLICE

NAGALAND :: KOHIMA.

NO.PHQ (D-II)CLO/2014(Pt)/1775

Dated Kohima the 10th July 2025

TENDER NOTICE

Sealed tender are hereby invited for supply of Clothing/Equipment Items for Nagaland Police, Nagaland Armed Police (NAP) and Indian Reserve Battalions (IRB) for the year 2025 - 2026. Interested tender(s) may collect detailed tender notice from the office of the **Director General of Police, Nagaland Kohima**, on payment of Rs. 500/- (Rupees five hundred) only on any working days and shall be issued with effect from 11th July 2025. Last date of receipt of tender **11th August 2025 till 12.00 hrs** and shall be opened on the same day at 13.00 hrs in presence of tenderer(s).

Sd/-
(RUPIN SHARMA) IPS
Director General of Police
Nagaland: Kohima.

GOVERNMENT OF NAGALAND

DIRECTORATE OF YOUTH RESOURCES AND SPORTS

NAGALAND: KOHIMA

NO.DYRS-SPORTS-KISCE(Mp)/14/2020(V-II)/

Dated, Kohima the ____ July 2025.

ADVERTISEMENT

The Department of Youth Resources and Sports invites applications from eligible citizens of India purely on hiring basis under Khelo India State Centre of Excellence Kohima (KISCE) and terminable as and when the scheme culminates for filling up of 1(one) post of High Performance Manager (HPM) with upper age limit of 65 years of age, remuneration of Rs.1 lakh-1.5 lakhs p.m and eligibility criteria as follows:-

a. Master in Sports (MSI/PHD/MBA) with at least 10 Years of Research Experience.

OR

b. Eminent players having represented India in Senior Category with at least 5 Years of sports management/ Research experience.

OR

c. Eminent Coach having trained Indian Player with at least 10 years of sports management/ Research experience.

Interested candidates may mail to kiscehpm@gmail.com with a biodata on or before 31st July 2025 till 4:00 p.m.

Documents to be attached :

1. Highest and relevant educational qualification.

2. Experience certificates.

3. In case of eminent players/coaches certificate to the effect.

4. Certificates of relevant additional qualification if any.

Sd/-
DIRECTOR, YRS

Conrad Sangma-i Durand Cup Trophy sayaogo

Shillong, Chiteni/July 9 (Agencies): Meghalaya Chief Minister Conrad K Sangma-i Bodhbarnü 134buba Durand Cup 2025 indang trophy sayaogo. State nung trophy tour tenzükba setong ka State Convention Centre nung agiba mapang CM-i iba trophy sayaja liasü.

Durand Cup ya alima nung asayamung tejentiba rongnung ka lir aser linük nung ajak dang tongtibatiba asayamung ka lir.

Meghalaya ya sporting hub ka küm daksütsü atema nükjidadong yur jenjang agiba mapang tang iba asayamung ayongzüka asayatsü lir.

Sentong nung chief minister-i taoba küm tenet tsüngda sports infrastructure atema senotsü intokba indang metetdaksü. Pai ashiba agi, state kübok tesem ajung nung sen crore 2,000 shi intokogo, kong Mawkanu Sports Complex densema lir, koba



India nung football stadium tulutiba rongnung ka asütsü.

"Asayamung asayatsü atema Shillong shimba atema ni Indian Armed Forces dang kanga pelar," ta Sangma-i ashi. "Taoba küm teti bilemtetsüsa asayaogo aser taküm tajungba asayatsü, kechiyong local tem timba asayatsü lir," ta CM-i ashi.

Iba asayamung nung Shillong nung asaya ti asayatsü lir, kong quarterfinal ka aser semifinal ka densema lir, koba JN Sports Complex nung

asayatsü, ta paisa shisem.

Trophy road show ya Shillong, Nongstoin, aser Tura nung ayongzüka agitsü, aser iba ajanga nüburttem nem asayamung metenzük tsüngda iba trophy ya reprangdangtsü atema maongka agütsütsü.

Taküm Durand Cup nung Meghalaya team asem asayatsü. Shillong nung team tem rongnung Shillong Lajong FC, Ryntih Sports Club, aser Meghalaya Police Football Team densema lir.

Küm pezü sülen Archer tang mezüngbuba Test asayatsü

Chiteni/July 9, 2025 (Agencies): Lord's nung India den asayatsü aliba Test atema team nung züngoksemba sülen Jofra Archer küm pezü dak tema lir tang mezüngbuba England team nungi asayatsü lir.

England team nung iba Test atema arishi küm 30 tain asayar ya züngoksemba dak alaka tanga asayartem ka danga memelenshi.

Edgbaston nung tanabuba Test asaya makokba asaya nung Chris Woakes aser Brydon Carse naprongla belematoker ama reprangtetaka tenaprongla team nung züngoksemogo, saka Josh Tongue melena Archer shimogo.

England XI team nung Archer shimba sangdongba anogo külem pace bowler Mark Wood-a Lord's nung training agia liasü, shiba temekok yiruba sülen tang tashi masayateti arudar.

Wood ya India den Test asaya ponguprongla nung masayatetsü ta bilem saka pa Oval nung tatembangbuba Test asayatsü aliba nungbo asayatsü imlar. Wood-a temang anema kümra Archer

tena tang agi tanabuba ang kasa team nungi asayaba angutsü.

Archer-i tang tashi nung Test asaya 13 nung wicket 43 agir lir, saka pa teberem aser tekatsüla yiruba ajanga masayatetti arudar. Archer tatembangbuba asayaba sülen England team Test 53 bo asayatokogo. Pa anogo 1,595 sülen tang mezüngbuba asayatsü lir.


Mapang kar nungbo Archer Test asayatetsü masayatetsü mejangjai liasü aser ibaji dang masü mapang kar nungbo pa career tembangtsü akok ta bilema aruogo.

2023 küm tetsükdaksü tulu ajangshiba sülen Archer England-i sentong yanglua toktsüba sülen anidak. Pa Test mapang talangka masayaka England-i pa dang tamang kateta aruogo.

India den asaya atema England team:

Ben Duckett, Zak Crawley, Ollie Pope, Joe Root, Harry Brook, Ben Stokes (captain), Jamie Smith, Chris Woakes, Brydon Carse, Jofra Archer, Shoaib Bashir.

Pakistan asayar Babar, Rizwan & Afridi meshim



Babar Azam



Mohammad Rizwan



Shaheen Shah Afridi

Chiteni/July 9, 2025 (Agencies): Bangladesh den T20I asem asayatsü atema Pakistan cricket team shimertemi asayar 15 tenüng sangdongba mapang maneni asaya tejen aser taoba captain Babar Azam, Mohammad Rizwan, aser Shaheen Shah Afridi nunger meshim.

T20I asaya nung team ya maneni Salman Ali Agha lenisüba nung asayatsü. Vice-captain Shadab Khan aser pacer Haris Rauf na yiruba ajanga meshim.

Shadab bo UK nung tapu surgery kanga takok ngua agiogo.

Tang asaya aliba 2025 Major League Cricket (MLC) nung San Francisco Unicorns' puri Texas Super

Kings akokba asaya nung hamstring yiruba sülen Rauf iba asayamung atema team nung mezüngoksem.

Pakistan team Bangladesh-i July 16 nü aotsü. T20I asayamung ya July 20 nü tenzüksü aser iba sülen tanabuba aser tasembuba asaya July 22 aser 24 nü asayatsü.

Team ana ya tatemsa taküm May ita asayaogo. Iba asayamung ya Pakistan nung asaya aser parnoki 3-0 agi koka liasü.

Bangladesh nung oa asayaba sülen Pakistan team ano white-ball asayamung atema West Indies-i aotsü. Caribbean team den T20I asaya asem asayatsü aliba ya United States nung July 31,

August 2 aser August 3 nü asayatsü.

Kasa mapang nung West Indies den ODI asaya asem asayatsü aliba ya Trinidad nung Brian Lara Cricket Academy nung August 8, 10 aser 12 nü asayatsü.

Bangladesh den asaya atema Pakistan Squad:

Salman Ali Agha (captain), Abrar Ahmed, Ahmed Daniyal, Faheem Ashraf, Fakhar Zaman, Hassan Nawaz, Hussain Talat, Khushdil Shah, Mohammad Abbas Afridi, Mohammad Haris (wicketkeeper), Mohammad Nawaz, Sahibzada Farhan (wicketkeeper), Saim Ayub, Salman Mirza, aser Sufyan Moqim.

Newcastle-i Elanga atema pound million 55 agütsütsü mulungogo

Chiteni/July 9, 2025 (Agencies): Newcastle United-i Nottingham Forest nem Sweden nunger winger Anthony Elanga atema pound million 55 agütsütsü mulunga agizükogo.

Sources-i BBC sports dang ashiba agi, tenangzüktepba ya iba hopta tembanga renemtsü akok.

Taoba season Premier League nung pongububa nung tembangba sülen parnok Champions League asayatsü lir anungji Newcastle pur attacking akangshitsü merangdar.

Arishi küm 23 tain asayar yagi 2024-25 Premier League season nung Nuno Espirito Sant-i aniba team atema goal trok idaksü aser assist 11 süja liasü.

Newcastle puri taküm lemluwa tang tashi nung

asayar ka atema danga taah agüja mali. Parnoki Malaga nungi free transfer nung Spain nunger winger Antonio Cordero anir aruogo.

Forest puri 2023 küm Elanga atema Manchester United nem pound million 15 agütsü aser küm pongu atema tenangzüktepba yanglua liasü.

Pa arishi küm 12 asü dang Old Trafford-i ao aser iba club nungi 55 ben asayaba sülen Forest nung oa dena liasü.

Forest nung taoba season kanga junga asayaba Newcastle puri Elanga alinüa mera agiba ajanga pa indang jenjang aika akümba sayur. Pa indang statistical profile ajanga pa ya kanga renloka aoba asayar ka dang masü saka lenla kar nungbo temeba jenjang nung asayaba sayur.

BILEMDANGANG

"Nüsasa na memeimra tangar koda meimtsü,"